



PM ajak Keluarga Malaysia pertahan kemerdekaan

Oleh Muhammad Yusri Muzamir - Ogos 30, 2022 @ 9:00pm
yusri.muzamir@bh.com.my

Kuala Lumpur: Datuk Seri Ismail Sabri Yaakob mengajak Keluarga Malaysia terus mempertahankan kemerdekaan yang diperjuangkan oleh wira terdahulu, terutama pada era modenisasi.

Perdana Menteri berkata, ini kerana bentuk penjajahan pada era modenisasi ketika ini berbeza berbanding era kolonial dengan semua negara terkena dampaknya.

Beliau berkata, penjajahan baharu itu membabitkan bidang ekonomi, teknologi dan budaya dengan anasir luar menggunakan pelbagai kaedah untuk menjajah semula dalam bentuk yang lebih canggih.

"Pada era modenisasi ini, bentuk penjajahan tidak lagi sama seperti era kolonial. Justeru, jika kita tidak mempertahankan kemerdekaan yang diperjuangkan oleh wira terdahulu, sejarah mungkin berulang dan kita kembali dijajah.

"Meskipun ancaman penjajahan baharu ini bukanlah dari segi fizikal, ia sangat berbahaya dan cara paling mudah untuk menaruh minda serta jati diri bangsa, seterusnya mampu menghancurkan sesebuah negara.

"Hanya rasa cinta kepada negara membolehkan kita terus bekerjasama dan bersatu padu untuk mempertahankan nilai kedamaian, keamanan dan kemerdekaan bagi membangun dan menjaga kedaulatan kita," katanya menerusi Perutusan Kebangsaan 2022 di sini, malam ini.

Ismail Sabri berkata, rahmat dan nikmat kemerdekaan dikecapi ketika ini adalah hasil perjuangan titisan darah, keringat dan air mata, selain menjelaskan 'yang bulat tidak datang bergolek, yang pipih tidak datang melayang'.

Mat Kilau, Datuk Dol Said, Tok Janggut, Datuk Bahaman, Tok Gajah, Rentap, Datuk Maharajalela, Datuk Sagor, Haji Abdul Rahman Limpong, Datu Mat Salleh, Rosli Dhobi adalah antara tokoh yang berkorban demi tanah air tercinta.

"Tidak terhitung banyaknya nyawa yang terkorban dan tidak terkira nilai kerugian harta benda dalam mencapai sebuah erti kemerdekaan.

"Ketika perjuangan menentang penjajahan Portugis, Belanda, Inggeris dan Jepun, ramai pejuang yang aulia rebah demi mempertahankan pertiwi," katanya.

Mengimbau pesanan Mat Kilau, Ahli Parlimen Bera itu berkata, perjuangan mesti diteruskan generasi muda, jangan biar tanah air tergadai, jangan sesekali mudah dipicit sehingga terbelah dua.

"Kalau beragama, jangan sekadar pakaianya (syariat), biar tentu bersih juga tubuhnya (hakikat). Kalau belajar, jangan sekadar ilmunya, biar tentu kukuh juga adabnya.

"Kalau beramal, jangan sekadar ayatnya, biar tentu juga berbulat dengan rahsia-Nya. Itulah antara amanat Pahlawan Mat Kilau yang boleh dijadikan sebagai azimat," katanya.

Perdana Menteri berkata, semangat seperti itu perlu digilap kepada generasi baharu supaya mengenal sejarah pahlawan negara di samping menyedarkan pemimpin bangsa ke arah landasan yang betul mengikut tuntutan dan ajaran agama.

Beliau berkata, semangat dan perjuangan yang wujud sejak dulu, terus mengalir dan diterjemahkan dalam Rundingan Kemerdekaan di Kota London, pada 1956.

"Nilai kemerdekaan inilah akhirnya, yang berjaya memupuk perpaduan dalam kalangan Keluarga Malaysia yang berbilang kaum, bangsa dan agama, selain integrasi nasional silang budaya merentasi Semenanjung, Sabah dan Sarawak.

"Tiada ungkapan dapat dizahirkan untuk menggambarkan sanjungan dan rasa terima kasih ke atas perjuangan serta pengorbanan pejuang negara terdahulu termasuk anggota keselamatan, tentera dan polis.

"Adat bersaudara, saudara dipertahankan; Adat berkeluarga, keluarga dilindungi; Adat berkampung, kampung dijaga; Adat berbangsa, perpaduan bangsa diutamakan; Sesungguhnya kita semua satu keluarga; Keluarga Malaysia penyambung warisan," katanya.

Mengulas lanjut, katanya, Malaysia kini signifikan di mata dunia, selain sudah membuktikan pencapaian ekonomi dengan pertumbuhan Keluaran Dalam Negeri Kasar (KDNK), sebanyak 8.9 peratus bagi suku kedua 2022 dengan pencapaian itu adalah terbaik di Asia Tenggara.



Perarakan membawa Jalur Gemilang pada sesi raptai penuh sambutan Hari Kebangsaan 2022 dengan tema 'Keluarga Malaysia Teguh Bersama' di Dataran Merdeka, Kuala Lumpur. NSTP/Hairul Anuar Rahim